



REPUBLIKA E SHQIPËRISË
KRYEMINISTRIA
ZËVENDËSKRYEMINISTRI



SP

Nr. 6587/prot.

Tiranë, më 24.12 2020

Lënda: Kërkohe mendim për një projektvendim.

MINISTRISË SË DREJTËSISË
Tiranë

MINISTRISË SË FINANCAVE DHE EKONOMISË
Tiranë

MINISTRISË SË INFRASTRUKTURËS DHE ENERGJISË
Tiranë

MINISTRISË SË BUJQËSISË DHE ZHVILLIMIT RURAL
Tiranë

MINISTRISË SË BRENDSHME
Tiranë

AVOKATURËS SË SHETIT
Tiranë

AGJENCISË SË TRAJTIMIT TË PRONAVE
Tiranë

Bashkëlidhur ju dërgojmë për mendim projektvendimin “Për përcaktimin e rregullave të lëshimit të akteve të kalimit në pronësi, pa shpërblim, të tokës bujqësore dhe miratimin e aktit individual të kalimit të pronësisë”, si dhe për përcaktimin e normës së sipërfaqes shtesë dhe pronës shërbyese”, së bashku me relacionin shpjegues.

Lutemi mendimin tuaj për të vijuar procedurat e paraqitjes së projektvendimit për shqyrtim e miratim në Këshillin e Ministrave.

Duke ju falenderuar për bashkëpunimin,

ZËVENDËSKRYEMINISTRI

ERION BRAÇE





**REPUBLIKA E SHQIPËRISË
KËSHILLI I MINISTRAVE**

PROJEKTVENDIM

Nr. __, datë __. __. 2020

**PËR
PËRCAKTIMIN E RREGULLAVE TË LËSHIMIT TË AKTEVE TË
KALIMIT NË PRONËSI, PA SHPËRBLIM, TË TOKËS BUJQËSORE
DHE MIRATIMIN E AKTIT INDIVIDUAL TË KALIMIT TË
PRONËSISË**

Në mbështetje të nenit 100, të Kushtetutës dhe të pikës 6, të nenit 14, të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”, me propozimin e Zëvendëskryeministrit, Këshilli i Ministrave

V E N D O S I:

I. DISPOZITA TË PËRGJITHSHME

1. Kalimi në pronësi pa shpërblim, për tokën bujqësore në përdorim do të kryhet nga ASHK, për:
 - a) Kërkesat e patrajuara, dhe të refuzuara për shkak moslegjitimitimi, që janë paraqitur pranë organeve kompetente në zbatim të ligjit nr.9948, datë 7.7.2008, “Për shqyrtimin e vlefshmërisë ligjore të krijimit të titujve të pronësisë mbi tokën bujqësore” i shfuqizuar, dhe ligjit nr.171, datë 18.12.2014 “Për përfundimin e procedurave ligjore të kalimit të tokës bujqësore të ish-ndërmarrjeve bujqësore në pronësi të përfituesve”, i shfuqizuar. Përjashtim këtu bën rasti kur refuzimi i kërkesës për shkak molegjitimitimi, është konfirmuar nga një vendim gjykate i formës së prerë.
 - b) Kërkesat që janë paraqitur pranë njësive të vetëqeverisjes vendore brenda afatit 6 mujor nga hyrja në fuqi e ligjit nr.20/2020, “Për

përfundimin e proceseve kalimtare të pronësisë në Republikën e Shqipërisë”.

- c) Kërkesat, që mbështen në një vendim gjykate të formës së prerë që detyronte institucionet ligjzbatuese të kohës, të pajisnin subjektin me tokë bujqësore.
 - ç) Kërkesat që kanë për objekt kalimin në pronësi të parcelave, të cilat pavarësisht se, nuk janë pasqyruar në aktin e marrjes së tokës në pronësi që disponohet nga subjekti, përdoren nga ky i fundit.
2. Në procesin e kalimit në pronësi pa shpërblim të tokës bujqësore, ASHK i referohet rregullave dhe afateve të përcaktuara në Kodin e Procedurave Administrative, përveç rasteve të parashikuara ndryshe në ligjin nr.20/2020, “Për përfundimin e proceseve kalimtare të pronësisë në Republikën e Shqipërisë”.
3. Në përmbushje të qëllimeve të ligjit nr.20/2020, “Për përfundimin e proceseve kalimtare të pronësisë”, të gjitha institucionet që kanë detyrimin të dorëzojnë arkivat dhe dokumentacionin përkatës për reformën agrare para vitit 1946, për dhënien në përdorim dhe pronësi të tokës bujqësore, përfshi hartat dhe regjistrat e kadastrës së tokës bujqësore, për verifikimin e titujve të tokës bujqësore dhe çdo dokument që ka lidhje me to. Nëse ky detyrim nuk është përmbushur ende, dorëzimi i dokumentacionit pranë ASHK-së, duhet të kryhet brenda 30 ditëve nga hyrja në fuqi e këtij vendimi.

II. KRITERET DHE PROCEDURA PËR KALIMIN NË PRONËSI PA SHPËRBLIM TË TOKËS BUJQËSORE

4. Kriteret që duhet të plotësohen për kalimin në pronësi të tokës bujqësore në përdorim janë:
- 4.1 Kriteret që duhet të plotësohen nga subjekti për kalimin në pronësi të tokës bujqësore:
- a) Do të përfitojë kalimin në pronësi pa shpërblim të tokës bujqësore, sipas kritereve të pikës 1, të nenit 12, të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”, subjekti që:
 - i. Ka qenë antar i ish-kooperativës bujqësore dhe banor i fshatit në përberje të ish-kooperativës bujqësore në datën 1.08.1991;

- ii. Ka qenë banor i fshatit në përberje të ish-kooperativës bujqësore në datën 1.8.1991, pavarësisht se nuk ka qenë anëtar i saj;
- iii. Ka qenë anëtar themelues i ish-kooperativës apo ish-ndërmarrjes bujqësore dhe banonte në territorin e tyre në datën 1.10.1992;
- iv. Ka qenë punonjës i ish-ndërmarrjes bujqësore në datën 1.8.1991;
- v. Ka përfituar nga e drejta sipas neneve 5 dhe 6, të ligjit nr.7514, datë 30.9.1991 “Për pafajësinë, amnistinë dhe rehabilitimin e ish-të dënuarve dhe të përndjekurve politikë” dhe që ishin subjekt të ligjit nr.7501, datë 19.7.1991 “Për tokën”;
- vi. Është zhvendosur nga qendra e tij e banimit për në territoret e ish-ndërmarrjes bujqësore me vendim të Këshillit të Ministrave, sipas të cilit janë edhe përfitues të tokës bujqësore në pronësi;
- vii. Është ose janë trashëgimtarë ligjorë të personit, toka e të cilit është marrë gjatë reformës agrare, për krijimin e ish-kooperativave bujqësore dhe ish-ndërmarrjeve bujqësore, pavarësisht vendbanimit të tyre në kohën e paraqitjes së kërkesës, referuar të dhënave që rezultojnë nga, dokumentacioni kadastral i strukturës së administrimit dhe menaxhimit të tokës (DAMT/ZAMT) dhe konkretisht, dokumentat në të cilat evidentohen pronësitë private apo shtetërore para hyrjes në fuqi të ligjit nr.108, datë 29.8.1995 “Për reformën agrare”, siç janë listë pronësitë, regjistrat, apo çdo arkivë tjetër nga ku rezultojnë të dhëna të tilla.

Për përmbushjen e kushteve sipas nënpikave i-vi, drejtoria vendore e ASHK-së, shqyrton listën e kryefamiljarëve dhe gjendjen familjare të datës 1.8.1991 apo listën që është disponuar gjatë ndarjes së tokës bujqësore, librin e ngastrave të fshatit, listën e familjeve anëtare të ish-kooperativës/ndërmarrjes bujqësore, si dhe çdo dokument i cili ka të dhëna mbi procesin e ndarjes së tokës bujqësore. Vendbanimi dhe gjendja familjare sipas periudhave të përcaktuara në paragrafët i-vi të kësaj pike, vërtetohet nëpërmjet certifikatës të gjendjes familjare të subjektit kërkues. Nëse nuk vërtetohet legjitimiteti i kërkuesit sipas nënpikave i-vi, atëherë ky i fundit mund të depozitohet pranë ASHK-së :

- i. Vërtetimin nga sigurimet shoqërore që ai ka qënë punonjës i ish-kooperativës apo ish-ndërmarrjes bujqësore, ose
- ii. Vendimin e gjykatës që provon se ka qënë punonjës i ish-kooperativës apo ish-ndërmarrjes bujqësore; ose
- iii. Vendimin e gjykatës që provon të drejtën e tij dhe anëtarëve të familjes për të përfitur tokë bujqësore.

b) Subjekti që ka paraqitur kërkesë për kalimin në pronësi pa shpërblim të tokës bujqësore nuk duhet të ketë përfitur tokë bujqësore në territorin e ndonjë ish-kooperative apo ish-ndërmarrjeje bujqësore tjetër. Për vlerësimin e këtij kriteri, ASHK, shqyrton dokumentacionin e administruar nga struktura e kadastrës së rrethit, referuar vendbanimit në datën 1.8.1991 dhe vendbanimit aktual, në raport me vendndodhjen e pronave për të cilat subjekti kërkon të pajiset me aktin e marrjes së tokës në pronësi.

Dokumentacioni dhe të dhënat që shqyrtohen nga ASHK për këtë qëllim janë:

- i. Vendimet e komisioneve të tokës së rretheve që kanë përcaktuar fshatrat e ish-kooperativave bujqësore;
- ii. Librat e ngastrave bujqësore të fshatrave;
- iii. Librat e ngastrave të fshatrave, për vendbanimin më 1.8.1991, si dhe për vendbanimin aktual;
- iv. Listën e përfituesve të tokës bujqësore në vendbanimin e datës 1.8.1991 dhe në vendbanimin aktual;
- v. Listën me emrat e kryefamiljarëve që është disponuar gjatë ndarjes së tokës bujqësore në fshat;
- vi. Të dhënat e regjistrit kadastral, për të evidentuar nëse ka ose jo regjistrime të tjera në favor të përfituesit, mbi bazën e një akti të marrjes së tokës në pronësi.

Nëse nuk provohet plotësimi i këtij kriteri, subjektit i lind e drejta të depozitojë një deklaratë noteriale nëpërmjet të cilës të deklarojë që s'ka përfitur tokë në territorin e asnjë ish-kooperative apo ndërmarrje bujqësore tjetër, përveç ngastrave për të cilat ai kërkon të pajiset me aktin e marrjes së tokës në pronësi. Deklarimi i rremë sipas kësaj pike, përbën shkak për kufizim pa afat të pasurisë dhe sipas rastit nëse prona është shtetërore, vënien në dijeni të Avokaturës së Shtetit, sipas pikës 3 të, nenit 8, të ligjit nr.20/2020, "Për përfundimin e proceseve kalimtare të pronësisë në Republikën e Shqipërisë".

- c) Subjekti që ka paraqitur kërkesë për kalimin në pronësi pa shpërblim të tokës bujqësore është përdorues faktik i tokës bujqësore. Për shqyrtimin e këtij kushti, ASHK së bashku me njësinë e vetëqeverisjes vendore, verifikon nëse:
- i. Subjekti ka paguar taksat vendore pranë njësisë së vetëqeverisjes Vendore;
 - ii. Nga dokumentacionin kadastral që administrohet nga ASHK në kuadër të regjistrimit të pasurive të paluajtshme, rezultojnë të dhëna që provojnë se subjekti është përdorues faktik, para datës së hyrjes në fuqi të këtij vendimi;
 - iii. Nga evidentifikimi faktik në terren rezulton se subjekti është përdorues faktik.

4.2 Kriteret që duhet të plotësojë toka bujqësore, për të cilën kërkohet kalimi i pronësisë, janë si vijon:

- a) T'i përkasë njërit prej llojeve të tokës bujqësore (arë, pemëtore, vreshtë dhe ullishte) në momentin e miratimit të vendimit të kalimit në pronësi pa shpërblim të tokës bujqësore. Për verifikimin e llojit të pasurisë, ASHK i referohet dokumentacionit të administruar nga Drejtoria e Administrimit të Tokës, si librat e tokës, librat e ngastrave të fshatit, regjistrat apo dokumentacionin ku janë pasqyruar të dhëna dhe tregues për tokën bujqësore, apo për kategorinë e resursit të tokës gjatë periudhës 29 gusht 1945 deri në 19 shtator 1991, hartat kadastrale të afërta me momentin e miratimit të vendimit të kalimit në pronësi, si edhe aktet e organeve publike, nëpërmjet të cilave janë realizuar ndryshime apo kalime të tokës bujqësore në resurse të tjera dhe anasjelltas.

Kur mungon dokumentacioni nga Drejtoria e Administrimit të Tokës, ASHK i referohet dokumentacionit të ndarjes së tokës, të depozituar nga njësia e vetëqeverisjes vendore, ku ndodhet sipërfaqja për të cilën kërkohet pajisja me aktin e kalimit në pronësi pa shpërblim i tokës bujqësore.

Nëse rezulton se lloji i tokës për të cilën kërkohet pajisja me aktin e kalimit në pronësi ka qenë e ndryshme nga zërat e tokës bujqësore, refuzohet kërkesa.

- b) Toka bujqësore për të cilën kërkohet kalimi i pronësisë të mos jetë në pronësi të të tretëve. Për verifikimin e këtij kriteri ASHK shqyrton:
- i. Dokumentacionin kadastral të regjistruar, për të verifikuar nëse ka titull të regjistruar në favor të subjektit kërkues;
 - ii. Dokumentacionin e ndarjes së tokës bujqësore të administruar nga struktura e administrimit dhe mbrojtjes së tokës pranë Këshillit të Qarkut dhe njësisë së vetëqeverisjes vendore (DAMT/ZAMT);
 - iii. Vendimmarrjet për kthim ose kompensim fizik prone, për pasurinë/ngastrën, për të cilën kërkohet pajisja me aktin e kalimit në pronësi të tokës bujqësore.
- c) Toka bujqësore për të cilën kërkohet kalimi i pronësisë të mos jetë objekt i formave të kompensimit fizik sipas ligjit nr.133/2015, “Për trajtimin e pronës dhe përfundimin e procesit të kompensimit të pronave”, i ndryshuar. Për verifikimin e këtij kriteri ASHK, i kërkon ATP-së informacion nëse pasuria/ngastra për të cilën kërkohet pajisja me aktin e kalimit në pronësi të tokës bujqësore është objekt i formave të kompensimit fizik.
- ç) Toka bujqësore për të cilën kërkohet kalimi i pronësisë të mos jetë objekt i investimeve strategjike, sipas legjislacionit në fuqi për investimet strategjike në Republikën e Shqipërisë. Për verifikimin e këtij kriteri ASHK, i kërkon AIDA-s informacion nëse pasuria/ngastra për të cilën kërkohet pajisja me aktin e kalimit në pronësi të tokës bujqësore është objekt i investimeve strategjike në Republikën e Shqipërisë.
- d) Toka bujqësore për të cilën kërkohet kalimi i pronësisë të mos jetë zënë nga ndërtime pa leje të të tretëve apo të vetë subjektit, gjë që verifikohet gjatë evidentimit në terren dhe nëpërmjet bazës së të dhënave të proceseve kalimtare të pronësisë.

5. Vendimi i kalimit në pronësi pa shpërblim të tokës bujqësore është sipas aneksit 1 që i bashkëlidhet dhe është pjesë përbërëse e këtij vendimi. Ai miratohet në favor të:

- a) Anëtarëve të familjes, sipas gjendjes familjare të datës 1.8.1991 dhe gjendjes familjare aktuale, për ish-kooperativat bujqësore;

- b) Anëtarëve të familjes, sipas gjendjes familjare të datës 1.8.1991 me ndryshimet deri në 1.10.1992 dhe gjendjes familjare aktuale për ish-ndërmarrjet bujqësore;
- c) Të gjithë trashëgimtarëve ligjorë të subjektit, që i është marrë toka gjatë reformës agrare, për krijimin e ish-koperativave bujqësore dhe ish-ndërmarrjeve bujqësore, pavarësisht vendbanimit të tyre në kohën e lëshimit të AMTP-së, për rastet e përcaktuara në nënparagrafin vii të shkronjës “a” të pikës 4.1, të këtij vendimi.

Nëse ndonjë nga trashëgimtarët ka përfituar AMTP tjetër në bazë të ndonjë cilësie të përcaktuar në nënparagrafët i – vi të shkronjës “a”, të pikës 4.1, të këtij vendimi, ai nuk përfiton sipas këtij vendimi. Në këtë rast, akti i kalimit në pronësi pa shpërblim të tokës bujqësore për subjektin e shpronësuar (nënparagrafi vii, shkronja “a”, e pikës 4.1 të vendimit) lëshohet në emër të të gjithë trashëgimtarëve ligjorë të subjektit, me përjashtim të personit që ka përfituar tashmë një AMTP, në bazë të ndonjë cilësie të përcaktuar në nënparagrafët i-vi, të shkronjës “a”, të të pikës 4.1, të këtij vendimi.

- 6. ASHK harton listën e përdoruesve faktikë të tokës bujqësore mbi bazën e kërkesave të dorëzuara dhe të pranuara nga organet kompetente (njësitë e vetëqeverisjes vendore) dhe sipërfaqet e saktësuara, sipas kreut III të këtij vendimi.
- 7. Lista e hartuar nga ASHK përmban të dhënat mbi:
 - a) Gjenealogjet dhe numrin e identifikimit të përfituesit;
 - b) Numrin, sipërfaqen dhe llojin e pasurisë që kalohet në pronësi pa shpërblim;
 - c) Pasuritë kufitare të pasurisë që kalohet në pronësi pa shpërblim.
- 8. Lista e përdoruesve dhe paraqitja grafike e parcelave që kërkohet të kalohen në pronësi, afishohet për 30 ditë kalendarike në ambientet e fshatit, me qëllim që të verifikohen të dhënat nga përdoruesit/përfituesit dhe të paraqesin pretendimet e tyre. Gjatë këtij afati, pretendimet e paraqitura nga përfituesit pasqyrohen në dokumentacionin përfundimtar, të kalimit në pronësi pa shpërblim të tokës bujqësore.

9. Dokumentacioni përfundimtar për miratimin e kalimit në pronësi pa shpërblim të tokës bujqësore, është lista e përdoruesve faktikë, planvendosjet e pronave që kërkohen të kalohen në pronësi të nënshkruara nga përfaqësuesit e administratës së njësisë së vetëqeverisjes vendore dhe ASHK, si edhe relacioni përkatës. Dokumentacioni përfundimtar sipas kësaj pike, i paraqitet për miratim këshillit bashkiak të njësisë së vetëqeverisjes vendore.

10. Këshilli Bashkiak vendos sipas nenit 14, të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”.

Në rastet kur, këshilli bashkiak, me vendim të arsyetur, vendos rrëzimin e projektvendimit, ASHK-ja korrigjon përmbajtjen e listës, sipas vërejtjeve të këshillit bashkiak.

11. Pas miratimit të vendimit nga këshilli bashkiak, ASHK vijon me miratimin e vendimeve individuale për kalimin e tokës bujqësore në pronësi pa shpërblim, për përfituesit.

12. Regjistrimi i vendimit individual për kalimin e tokës bujqësore në pronësi pa shpërblim, kryhet kryesisht nga drejtoria vendore e ASHK-së, vetëm pasi të jetë plotësuar një nga kushtet e mëposhtme:

- a) të ketë kaluar afati 30-ditor i paraqitjes së ankimit administrativ ndaj vendimit dhe ndaj tij nuk është paraqitur ndonjë ankim. Afati i ankimit llogaritet nga data e njoftimit të vendimit; ose
- b) të ketë përfunduar shqyrtimi i ankimit nga struktura e posaçme për ankimet në Drejtorinë e Përgjithshme dhe vendimi të jetë lënë në fuqi, ose të jetë vendosur mospranimi i ankimit;
- c) në rastet kur struktura e posaçme për ankimet vendos për ndryshimin e përmbajtjes së vendimit të drejtorisë vendore të ASHK-së, ose shfuqizimin apo anulimin e pjeshëm të tij, regjistrimi kryhet pasi drejtoria vendore të ketë miratuar vendimin e ri për dokumentin e pronësisë, në bazë të aktit të strukturës së posaçme.

13. Regjistrimi kryhet nga drejtoria vendore e ASHK-së, pa u kushtëzuar nga aplikimi për shërbim kadastral dhe nga parapagimi i tarifave kadastrale. Pas kryerjes së shërbimit të regjistrimit ajo njofton subjektin përfitues për të shlyer tarifën e regjistrimit dhe tarifën e tjera për t’u pajisur me aktet

kadastrale, si: certifikatë regjistrimi pronësie, kopje karteles, kopje të fragmentit të hartës kadastrale.

III. SAKTËSIMI I SIPËRFAQES PËR KALIM PRONËSIE

14. Procesi i saktëimit të sipërfaqes dhe pozicionit gjeografik të tokës për kalim pronësie kryhet në bashkëpunim me përfaqësuesit e administratës së njësisë së vetëqeverisjes vendore dhe të ASHK-së. Për këtë qëllim bëhet verifikimi në terren i ngastrave të pretenduara. Gjatë këtij procesi, verifikohet pozicioni faktik i ngastrës që posedohet dhe sipërfaqes që posedohet në fakt. ASHK harton planin e rlevimit, i cili nënshkruhet nga përfaqësuesit e saj dhe përfaqësuesit e administratës së njësisë së vetëqeverisjes vendore.

14.1 Për zonat kadastrale pa regjistrim fillestar, procesi i lëshimit të akteve të kalimit të tokës bujqësore në pronësi kryhet pas perfundimit të konsultimit publik, sipas nenit 31, të ligjit nr.111/2018, “Për kadastrën”.

14.2 Për zonat kadastrale me regjistrim fillestar, që kanë nevojë për përmirësim të regjistrimit fillestar, procesi i lëshimit të akteve të kalimit të tokës bujqësore në pronësi, kryhet pas perfundimit të procesit të përmirësimit. Për zonat kadastrale me regjistrim fillestar dhe që nuk kanë nevojë për përmirësim, procesi i lëshimit të akteve të kalimit të tokës bujqësore në pronësi, kryhet si rregull me blloqe kadastrale.

15. Sipërfaqja e tokës bujqësore, që kalohet në pronësi pa shpërblim, është sipas rastit:

a) Sa sipërfaqja e përcaktuar në aktin e marrjes së tokës në përdorim ose në dokumentacionin e ndarjes së tokës. Nëse sipërfaqja e lirë në terren, është më e vogël se ajo e përcaktuar në aktin e marrjes së tokës në përdorim apo aktet e ndarjes së tokës bujqësore, subjektit i miratohet kalimi i pronësisë, pa shpërblim, vetëm për sasinë e sipërfaqes që rezulton e lirë. Nëse subjekti posedon sipërfaqe më të madhe se ajo e përcaktuar sipas aktit të marrjes së tokës në përdorim ose akteve të ndarjes së tokës, për sipërfaqen shtesë zbatohen për analogji përcaktimet e pikës 4, të nenit 10, të ligjit nr.20/2020, “Për proceset kalimtare të pronësisë në Republikën e Shqipërisë” dhe të akteve nënligjore që rregullojnë kalimin e sipërfaqeve shtesë.

b) Sa normativa, që llogaritet nga raporti i sipërfaqes aktuale që rezulton e lirë në territorin e fshatit, në raport me numrin e frymëve në fshat, në

momentin e miratimit të vendimit për kalimin në pronësi pa shpërblim të tokës bujqësore.

Sipërfaqe e lirë, konsiderohet ajo e cila gjatë regjistrimit fillestar ose pas përmirësimit/përditësimit rezulton se plotëson kushtet e pikës 4.2 të këtij vendimi.

- c) Sa sipërfaqja e përcaktuar ndërmjet marrëveshjes noteriale të përfituesve të tokës bujqësore. Marrëveshja noteriale ndërmjet përfituesve të tokës bujqësore, kufitarë, duhet të depozitohet pranë ASHK-së para fillimit të afatit të parashikuar në pikën 8, të këtij vendimi.

IV.DISPOZITA KALIMTARE DHE TË FUNDIT

16.Janë objekt trajtimi sipas këtij vendimi edhe ato raste kur subjekti kërkues nuk e përdor tokën, për arsye se organet që në bazë të vendimit të gjykatës së formës së prerë, detyroheshin të pajisnin qytetarin me tokë, nuk e kanë zbatuar atë.

17.Vendimi nr.253, datë 6.3.2013, i Këshillit të Ministrave, “Për përcaktimin e procedurave të plotësimit të akteve të marrjes së tokës bujqësore në pronësi për familjet bujqësore në fshatrat e ish-kooperativave bujqësore”, i ndryshuar, dhe vendimi nr. 337, datë 22.4.2015,i Këshillit të Ministrave, “Për përcaktimin e procedurave të kryerjes së procesit të kalimit të tokës bujqësore të ish-ndërmarrjeve bujqësore në pronësi të përfituesve” i ndryshuar, shfuqizohen.

18.Ngarkohet Agjencia Shtetërore e Kadastrës për zbatimin e këtij vendimi.

Ky vendim hyn në fuqi pas botimit në “Fletoren zyrtare”.

K R Y E M I N I S T R I

EDI RAMA



REPUBLIKA E SHQIPËRISË
AGJENSIA SHTETËRORE E KADASTRËS
DREJTORIA _____

VENDIM

Nr. _____, datë _____

**PËR
KALIMIN/ REFUZIMIN E KALIMIT NË PRONËSI PA SHPËRBLIM TË TOKËS
BUJQËSORE.**

Në zbatim të nenit 14 të ligjit nr.20/2020, "Për përfundimin e proceseve kalimtare të pronësisë në Republikën e Shqipërisë" dhe vendimit të Këshillit të Ministrave nr.... , datë "Për përcaktimin e rregullave të lëshimit të akteve të kalimit në pronësi të tokës bujqësore dhe miratimin e modelit të aktit individual" u mor në shqyrtim kërkesa e _____ për kalimin në pronësi të tokës bujqësore me vendndodhje: Bashkia: _____ ,

Parashtrimi i fakteve: (Këtu do të listohen)

- a). *Shpjegimet e situatës faktike parcelës si: adresa, numri i pasurisë, zona kadastrale, sipërfaqja e parcelës, sipas verifikimeve në terren; mënyrën e përcaktimit të sipërfaqes që kalohet në pronësi referuar normativës së përcaktuar, etj*
- b) *Situata ligjore në raport me kriteret për kalimin në pronësi pa shpërblim të tokës bujqësore, legjitimiteti i kërkuarit, kushtet e ngastrës/ngastrave që do të kalohet, etj.*
- c) *Dokumentacioni i administruar nga institucionet apo subjekti (me referencat) dhe veprimet administrative e dokumentacionit të hartuar nga ASHK në kuadër të procedurave të legalizimit, shpjegime mbi vlerësimin e provave.*

Vlerësimi dhe arsyetimi ligjor: (Shpjegimet mbi shkaqet ligjore të kalimit ose refuzimit të kalimit të tokës në pronësi).

Në përfundim, Drejtoria Vendore e ASHK-së _____ pasi verifikoi gjendjen faktike të ngastrës/ngastrave, analizoi dokumentacionin dhe faktet, si dhe verifikoi plotësimin/mosplotësimin e kriterëve ligjore nga ndërtimi pa leje, bazuar në nenin 12 të ligjit nr.20/2020, "Për përfundimin e proceseve kalimtare të pronësisë në Republikën e Shqipërisë dhe pikës ___ të vendimit të Këshillit të Ministrave nr.____, datë _____ "Për Vendimi për kalimin e tokës bujqësore në pronësi pa shpërblim përgatitet në 4 kopje origjinale, të cilat iu përcillen, përfituesit, njësisë së vetëqeverisjes vendore, drejtorisë së administrimit dhe menaxhimit të tokës pranë Këshillit të Qarkut dhe një (1) kopje mbetet pranë Drejtorisë Vendore të ASHK. Vendimi shoqërohet me planvendosje të ngastrës/vetëpërfiturar. Kundër këtij vendimi mund të ushtrohet ankim sipas nenit 66, të ligjit nr.20/2020, "Për përfundimin e poceseve kalimtare të pronësisë në Republikën e Shqipërisë" dhe Kodit të Procedurave Administrative.

aAnke

përcaktimin e rregullave të lëshimit të akteve të kalimit në pronësi të tokës bujqësore dhe miratimin e modelit të aktit individual”,

VENDOSI:

1. Kalimin/refuzimin e kalimit në pronësi të ngastrës me vendodhje _____, nr. pasurie _____, dhe sipërfaqe _____ në favor të _____.
2. Kundër këtij vendimi mund të ushtrohet ankim sipas nenit 66, të ligjit nr.20/2020, “Për përfundimin e poceseve kalimtare të pronësisë në Republikën e Shqipërisë” dhe Kodit të Procedurave Administrative”.
3. **(Kjo dispozitë bëhet pjesë e vendimit në rastin e kalimit të pronësisë)**-Ky vendim regjistrohet pas kalimit të afatit 30 ditor nga data e njoftimit të tij në rastin e mosankimit administrative ose pas përfundimit të procedurës së shqyrtimit të ankimit nga struktura përgjegjëse për ankimet pranë Drejtorisë së Pergjithshme ose;
4. Vendimi i njoftohet subjekteve të interesuara brenda 10 ditëve nga data e miratimit... dhe ekzekutohet menjëherë.

DREJTOR

Vendimi për kalimin e tokës bujqësore në pronësi pa shpërblim përgatitet në 4 kopje origjinale, të cilat iu përcillen, përfituesit, njësisë së vetëqeverisjes vendore, drejtorisë së administrimit dhe menaxhimit të tokës pranë Këshillit të Qarkut dhe një (1) kopje mbetet pranë Drejtorisë Vendore të ASHK. Vendimi shoqërohet me planvendosje të ngastrës/vetëpërfiturar. Kundër këtij vendimi mund të ushtrohet ankim sipas nenit 66, të ligjit nr.20/2020, “Për përfundimin e poceseve kalimtare të pronësisë në Republikën e Shqipërisë” dhe Kodit të Procedurave Administrative.

**RELACION
PËR
PROJEKTVENDIMIN**

**“PËR
MIRATIMIN E PROCEDURAVE TË LËSHIMIT TË AKTEVE TË
KALIMIT NË PRONËSI TË TOKËS BUJQËSORE DHE MODELIT TË
AKTIT INDIVIDUAL PËRKATËS”**

**I. QËLLIMI I PROJEKTAKTIT DHE OBJEKTIVAT QË SYNOHEN TË
ARRIHEN**

Ky projektvendim synon të plotësojë kuadrin nënligjor, në përputhje me përcaktimet e pikës 6, të nenit 14 të ligjit nr.20/2020 “Për përfundimin e proceseve kalimtare të pronësisë në Republikën e Shqipërisë”.

Objektivat që synohen të arrihen me miratimin e këtij projektvendimi, janë përcaktimi i procedurave të hollësishme për përfundimin e procesit të pajisjes me titull pronësie për tokën bujqësore për përdoruesit e saj, përcaktimin e fushës së kërkesave që do jenë objekt shqyrtimi/trajtimi sipas ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”, kriteret që duhet të plotësojë subjekti për kalimin në pronësi pa shpërblim të tokës bujqësore, si dhe kushtet që duhet të plotësojë ngastra, për të cilën kërkohet kalimi i pronësisë, që i kalon në pronësi përdoruesit të saj, sipas pikës 6 të nenit 14 të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”. Qëllim i projektaktit është edhe përcaktimi i procedurave të hollësishme për hartimin e listës së përdoruesve faktikë të tokës bujqësore, bashkëpunimidhe korrespondenca institucionale, me përfaqësues të Njësisë të Vetëqeverisjes Vendore, përcaktimin e sipërfaqes së tokës bujqësore, normës për frymë dhe verifikimit në terren të sipërfaqes së përdorimit faktik duke saktësuar sipërfaqen e kalimit në pronësi.

Ky projektvendim do të plotësojë kuadrin ligjor të veprimtarisë së Agjencisë Shtetërore të Kadastrës, mbi kalimin në pronësi të tokës bujqësore sipas listës së përdoruesve të tokës dhe për përfundimin e proceseve kalimtare administrativo-ligjore, të regjistrimit të titujve të pronësisë për pasuritë e paluajtshme.

Të gjitha rregullat dhe procedurat e hollësishme të përcaktuara në këtë vendim udhëhiqen nga qëllimi për të konsoliduar marrëdhëniet juridike të pronësisë mbi tokën bujqësore, përmes regjistrimit të akteve të marrjes së tokës në pronësi të përfutuara përpara hyrjes në fuqi të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”, duke ruajtur

rregullat dhe kriteret e sanksionuara shprehimisht në këtë projektvendim.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Projektvendimi vjen si nevojë e plotësimit të kuadrit nënligjor në zbatim të ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”. Ky akt është hartuar në përputhje me programin e qeverisë, duke përcaktuar në mënyrë të detajuar procedurat e hollësishme për kalimin në pronësi të tokës bujqësore, sipas listës së përdoruesve të tokës, listë kjo e miratuar me vendim të Këshillit Bashkiak, regjistrimin e AMTP-vetë lëshuara në zbatim të ligjit nr.20/2020 (përfshirë edhe AMTP-të në përdorim, të dhëna në zbatim të ligjit 7501/1991), përcaktimin e sipërfaqes së tokës bujqësore sipas normës për frymë, verifikimit në terren të sipërfaqes faktike të përdorimit të tokës bujqësore, në funksion të realizimit sa më me efektivitet të procesit të identifikimit dhe sistemimit të pronave, si një nga prioritetet e qeverisë në funksion të përfundimit të procesit të kalimit në pronësi, pa shpërblim, përdoruesve të tokave bujqësore të ish-kooperativave dhe ish-ndërmarrjeve bujqësore, si dhe të përmirësimit të procesit të regjistrimit të pronave, që lidhet drejtpërsëdrejti me nxitjen dhe zhvillimin e tregut të pasurive të paluajtshme në mënyrë sa me transparente.

Theksojmë se, projektvendimi është një instrument që shpreh angazhimin e drejtpërdrejtë të Këshillit të Ministrave për të plotësuar kuadrin ligjor në funksion të përfundimit të procesit të kalimit në pronësi, pa shpërblim të tokës bujqësore dhe përmirësimit të sistemit të regjistrimit të pasurive të paluajtshme, fuqizimit të zhvillimit të sektorit të bujqësisë nëpërmjet sigurisë juridike të regjistrimit të tokës bujqësore.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Projektvendimi është në përputhje me Kushtetutën e Republikës së Shqipërisë, Kodin Civil të Republikës së Shqipërisë dhe ligjin nr.20/2020, “Për përfundimin e proceseve kalimtare të pronësisë në Republikën e Shqipërisë”.

Për sa më sipër, miratimi i projektaktit paraqet rëndësi të vecantë për publikun dhe për vetë shtetin, pasi ndikon drejtpërdrejtë në përfundimin e procesit të kalimit në pronësi, pa shpërblim, përdoruesve të tokave bujqësore të ish-kooperativave dhe ish-ndërmarrjeve bujqësore, si dhe regjistrimit të pasurive të paluajtshme të tokës bujqësore duke zgjidhur dhe trajtuar njëkohësisht, një sërë

problematikash ekzistuese më pare, të ardhura si pasojë e keqzbatimit apo moszbatimit të ligjit nr.171/2014 dhe ligjit nr.9948, datë 7.7.2008, nga ana e institucioneve përgjegjëse më ligj.

Konkretisht objekt trajtimi dhe zgjidhjes konkrete të problematikave të këtij projektakti janë:

- Të gjitha kërkesat e patrajtuara, dhe të refuzuara për shkak moslegjitimimi, që janë paraqitur pranë organeve kompetente në zbatim të ligjit nr.9948 datë 07.07.2008 “Për shqyrtimin e vlefshmërisë ligjore të krijimit të titujve të pronësisë mbi tokën bujqësore” i shfuqizuar, dhe ligjit nr.171/2014 “Për përfundimin e procedurave ligjore të kalimit të tokës bujqësore të ish-ndërmarrjeve bujqësore në pronësi të përfituesve”, i shfuqizuar. Përfundimisht këtu bën rasti kur refuzimi i kërkesës për shkak mologjitimimi, është konfirmuar nga një vendim gjykate i formës së prerë.
- Të gjitha kërkesat që janë paraqitur pranë njësive të vetëqeverisjes vendore brenda afatit 6 mujor nga hyrja në fuqi e ligjit nr.20/2020, “Për përfundimin e proceseve kalimtare të pronësisë në Republikën e Shqipërisë.
- Të gjitha kërkesat, që mbështen në një vendim gjykate të formës së prerë që detyronte institucionet ligjzbatuese të kohës, të pajisnin subjektin me tokë bujqësore.
- Të gjitha kërkesat, që kanë për objekt kalimin në pronësi të parcelave të cilat pavarësisht se, nuk janë pasqyruar në aktin e marrjes së tokës në pronësi që disponohet nga subjekti, përdoren nga ky i fundit.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektvendimi është hartuar në mbështetje të nenin 100 të Kushtetutës, pika 6 e nenit 14, të ligjit nr.20/2020 “Për përfundimin e proceseve kalimtare të pronësisë në Republikën e Shqipërisë”, i cili shprehet se: “*Formati model i aktit individual të kalimit në pronësi të tokës bujqësore dhe rregullat përkatëse për lëshimin e këtyre akteve miratohen me vendim të Këshillit të Ministrave.*”

Nga shqyrtimi i projektaktit rezulton se përmbajtja e tij nuk tejkalon kompetencën që i është akorduar Këshillit të Ministrave nga dispozita e mësipërme ligjore.

Për sa i përket çështjes së kushtetutshmërisë së projekt-vendimit, nga pikëpamja formale, ai përbën një akt nënligjor të nxjerrë në respektim të tre kriterëve të parashikuara nga neni 118 i Kushtetutës:

1. Aktet nënligjore nxirren në bazë dhe për zbatim të ligjeve nga organet e parashikuara në Kushtetutë.

Përveç çështjes së bazueshmërisë ligjore, të shtjelluar më sipër, vendimi i

propozuar do të nxirret nga Këshilli i Ministrave - organ kushtetues.

2. *Ligji duhet të autorizojë nxjerrjen e akteve nënligjore, të përcaktojë organin kompetent, çështjet që duhen rregulluar, si dhe parimet në bazë të të cilave nxirren këto akte.*

Miratimi i këtij projektakti është qartësisht në respektim edhe të këtyre kritereve, pasi të gjitha përcaktimet e dispozitës kushtetuese të mësipërme, lidhur me autorizimin për nxjerrjen e aktit, organin kompetent dhe përmbajtjen, gjejnë pasqyrim në ligj.

3. *Organi i autorizuar me ligj për të nxjerrë akte nënligjore, siç specifikohet në paragrafin 2 të këtij neni, nuk mund t'ia delegojë kompetencën e tij një organi tjetër.*

Argumentimin e pajtueshmërisë me këtë parashikim e gjykojmë të panevojshëm, duke qenë se vetë nisma për propozimin e aktit ndaj Këshillit të Ministrave, është në vetvete tregues i saj (pajtueshmërisë).

Në këndvështrim të nenit 116 të Kushtetutës, i cili përcakton aktet normative me fuqi juridike në të gjithë territorin e Republikës së Shqipërisë dhe hierarkinë e tyre, vendimi i propozuar është evidente se i përket kategorisë së “akteve normative të Këshillit të Ministrave”, të parashikuara në pikën 1 ç) të nenit. Si i tillë, bazuar në argumentimin e parashtruar më sipër, vlerësojmë se projektvendimi i përmbahet kufijve të përgjithshëm të vendosur nga normat/aktet më të larta, si dhe respekton përmbajtjen e tyre.

Në lidhje me kushtetutshmërinë në këndvështrimin lëndor/thelbësor, vlerësojmë se, projektakti u përmbahet standarteve kushtetuese.

V. VLERËSIMI I SHKALLËS SË PËRAFRIMIT ME *ACQUIS COMMUNAUTAIRE* (PËR PROJEKTAKTET NORMATIVE)

Projektvendimi nuk synon përafrimin me *acquis të BE-sëe*.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Projektvendimi i paraqitur për shqyrtim është i strukturuar në pesë krerë, sipas përmbajtjes së mëposhtme.

Në kreun I, parashikohen dispozita të përgjithshme që kanë të bëjnë me përcaktimin e kërkesave që do të jenë objekt shqyrtimi/trajtimi të projektaktit sipas ligjit nr.20/2020, dhe konkretisht:

- a) Kërkesat e patrajtuara, dhe të refuzuara për shkak moslegjitimitimi, që janë paraqitur pranë organeve kompetente në zbatim të ligjit nr.9948 datë 07.07.2008 “Për shqyrtimin e vlefshmërisë ligjore të krijimit të titujve të

pronësisë mbi tokën bujqësore” i shfuqizuar, dhe ligjit nr.171 datë 18.12.2014 “Për përfundimin e procedurave ligjore të kalimit të tokës bujqësore të ish-ndërmarrjeve bujqësore në pronësi të përfituesve”, i shfuqizuar. Përfundim këtu bën rasti kur refuzimi i kërkesës për shkak moslegjitimit, është konfirmuar nga një vendim gjykate i formës së prerë.

- b) Kërkesat që janë paraqitur pranë njësive të vetëqeverisjes vendore brenda afatit 6 mujor nga hyrja në fuqi e ligjit nr.20/2020, “Për përfundimin e proceseve kalimtare të pronësisë në Republikën e Shqipërisë.
- c) Kërkesat që mbështen në një vendim gjykate të formës së prerë që detyronte institucionet ligjzbatuese të kohës, të pajisnin subjektin me tokë bujqësore.
- d) Kërkesat që kanë për objekt kalimin në pronësi të parcelave të cilat pavarësisht se, nuk janë pasqyruar në aktin e marrjes së tokës në pronësi që disponohet nga subjekti, përdoren nga ky i fundit dhe respektimii afateve dhe procedurave, sipas përcaktimeve ligjore të bëra në Kodin e Procedurave Administrative të R.Sh-së.

Kreu II, përmban rregullat dhe procedurën, kushtet, kriteret, si dhe dokumentacionin që duhet të plotësohet, për kalimin në pronësi të tokës bujqësore në përdorim, sipas ligjit nr.20/2020 “Për përfundimin e proceseve kalimtare të pronësisë në Republikën e Shqipërisë” dhe konkretisht:

- Përcaktohen kriteret që duhet të plotësojë subjekti për kalimin në pronësi pa shpërblim të tokës bujqësore, sipas ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”.
- Përcaktohen kushtet që duhet të plotësojë parcela bujqësore, për të cilën kërkohet kalimi i pronësisë, sipas ligjit nr.20/2020, “Për përfundimin e proceseve kalimtare të pronësisë në Republikën e Shqipërisë”.
- Përcaktohet mënyra e ndërveprimit dhe bashkëpunimit institucional, me përfaqësues të njësisë së vetëqeverisjes vendore për hartimin e listës së përdoruesve faktikë të tokës bujqësore, miratimin e saj, procedura e plotësimit të aktit të kalimit në pronësi pa shpërblim të tokës bujqësore dhe rastet kur ASHK-ja nuk lëshon aktin e kalimit në pronësi të tokës bujqësore.

Në këtë kre përcaktohen gjithashtu, në mënyrë të detajuar, edhe procedurat për lëshimin e akteve të kalimit në pronësi të tokës bujqësore. Konkretisht, përcaktohet qartë se është ASHK e cila pas verifikimeve në terren të sipërfaqes së tokës bujqësore objekt të kalimit në pronësi dhe në bashkëpunim me administratën e njësisë së vetëqeverisjes vendore, përgatit listën e përdoruesve faktik të tokës bujqësore, planvendosjen e pronave që kërkohen të kalohen në pronësi, relacionin përkatës në lidhje me shqyrtimin e plotësimit e kriterëve të përcaktuara në këtë projektakt dhe dosjen me materialin përkatës, ia përcjell Këshillit Bashkiak për miratim. Pas miratimit të projektvendimit të ASHK-së,

“Për miratimin e listës së përdoruesve faktikë të tokës bujqësore”, ASHK-ja vijon me plotësimin e Aktit të Kalimit të Tokës Bujqësore në Pronësi.

Në kreun III përcaktohen rregullat dhe procedurat që do të ndiqen në lidhje me procesin e saktësimit të sipërfaqes dhe pozicionit gjeografik të tokës për kalim pronësie. Ky proces, kryhet në bashkëpunim me përfaqësuesit e administratës të Njësive të Vetëqeverisjes Vendore dhe të ASHK-së, gjatë regjistrimit fillestar apo gjatë/ose pas përfundimit të procesit të përmirësim/përditësimit të zonës kadastrale ku ndodhet sipërfaqja faktike e pasurisë. Gjatë procesit të saktësimit të sipërfaqes (ngastrës) të pretenduar, verifikohet pozicioni faktik i ngastrës që posedohet dhe sipërfaqes që posedohet në fakt. Gjatë këtij procesi hartohet plani i rilevimit sipas standartit të miratuar nga ASHK, i cili nënshkruhet nga përfaqësuesit e ASHK dhe përfaqësuesit e administratës së Njesisë së Vetëqeverisjes Vendore. Përcaktohet qartë procesi se si do të kryhet lëshimi i akteve të kalimit të tokës bujqësore në pronësi. Në këtë kre përcaktohet gjithashtu edhe sipërfaqja takuese e sipërfaqes së tokës bujqësore që kalohet në pronësi pa shpërblim, e cila është:

- a. sa sipërfaqja e përcaktuar në aktin e marrjes së tokës në përdorim ose në dokumentacionin e ndarjes së tokës;
- b. sa normativa, që llogaritet nga raporti i sipërfaqes aktuale që rezulton e lirë në terren në territorin e fshatit, në raport me numrin e frymëve në fshat në momentin e miratimit të vendimit për kalimin në pronësi pa shpërblim të tokës bujqësore; dhe
- c. sa sipërfaqja e përcaktuar sipas marrëveshjes së përfituesve ndërmjet tyre.

Kreu IV, është ai dispozitave kalimtare dhe të fundit, në të cilin ngarkohet Agjencia Shtetërore e Kadastrës për zbatimin e projektaktit, shfuqizimet përkatëse të akteve nënligjore të mëparshme, si dhe hyrja në fuqi e projektvendimit.

Në këtë kre përcaktohet gjithashtu se janë objekt trajtimi sipas këtij vendimi edhe ato raste kur subjekti kërkues nuk e përdor tokën për arsye sepse organet shtetërore, që në bazë të vendimit të gjykatës së formës së prerë, detyroheshin të pajisnin qyrtetarin me tokë, nuk kanë zbatuar vendimin e gjykatës.

Për realizimin e procesit të kalimit në pronësi të tokës bujqësore, ASHK merr në dorëzim nga institucionet e përcaktuara në ligjin nr.20/2020, të gjitha kërkesat e depozituara nga subjektet dhe dokumentacionin që lidhet me ndarjen e tokës bujqësore.

VII. INSTITUCIONET DHE ORGANET QË NGARKOHEN PËR ZBATIMIN E AKTIT

Institucioni i ngarkuar për zbatimin e këtij projektakti, është ASHK, si institucioni që prodhon aktet kadastrale dhe ofron shërbimet kadastrale për regjistrimin e pasurive të paluajtshme, përfshirë edhe pasuritë që janë objekt i këtij projektvendimi.

VIII. MINISTRITË, INSTITUCIONET DHE SUBJEKTET E TJERA QË KANË KONTRIBUAR NË HARTIMIN E PROJEKTAKTIT

Projektvendimi është hartuar nga Agjencia Shtetërore e Kadastrës me kontributin e Kryeministrisë.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Projektvendimi nuk ka ndikim në të ardhurat dhe shpenzimet e buxhetit të shtetit.

ZËVENDËSKRYEMINISTRI

ERION BRACË

The image shows a handwritten signature in blue ink that overlaps the printed name 'ERION BRACË'. To the right of the signature is a circular official stamp in blue ink. The stamp features the coat of arms of Albania in the center and the text 'REPUBLIKA E SHQIPËRISE' at the top and 'MINISTRIA E KRYEMINISTRIA' at the bottom.